

Sed cum fideli spiritu
 Concurrat ad praesepia
 Pagana gens, et quadrupes,
 Sapiatque quod brutum fuit.
 Negat patrum prosapia,
 Perosa praesentem deum,
 Credas venenis ebriam
 Furiisve lymphatam rapi.
 Quid prona per scelus ruis?
 Agnosce, si quicquam tibi
 Mentis resedit integrae,
 Ducem tuorum principum.
 Hunc quem latebrae et obstetrix
 Et virgo foeta, et cunula,
 Et imbecilla infantia,
 Regem dederunt gentibus.
 Peccator intueberis
 Celsum coruscis nubibus,
 Dejectus ipse et inritis
 Plangens reatum fletibus.
 Cum vasta signum buccina
 Terris cremandis miserit,
 Et scissus axis cardinem
 Mundi ruentis solverit.
 Insignis ipse, et praeminens
 Meritis rependet congrua,
 His lucis usum perpetis,
 Illis gehennam et tartarum.
 Judaea tunc fulmen crucis
 Experta, qui sit senties,
 Quem te furoris praesule
 Mors hausit, et mox reddidit.